



## **Welttheaterdag 2015**

Déi wierklech Meeschtere vum Theater fénnt een net am Theater. Op alle Fall net an deem Theater, deen eng Maschinn ass fir Klischeen a Konventiounen ze reproduzéieren. Déi wierklech Meeschtere sichen no de liewege Quellen a Stréimungen, déi éischer e Bou ronderëm d'Theatersäll maachen an de ville Leit do, déi sech ploen dës oder déi Welt ze kopéieren. Mir maachen no, reproduzéieren, aplaz eege Welten ze schafen déi drop aus sinn en Dialog mam Publikum hierzustellen, an déi Emotiounen z'erkennen, déi énnert der Iwwerfläch sprudelen. A fir verstoppte Leidenschaften un den Dag ze bréngen, gëtt et näischt Besseres wéi den Theater.

Meng Repère fannen ech meeschtens an der Prosa, si begleede mech an engem Stéck. Et si Schrëftsteller, déi virun engem Jorhonnert prophetesch awer niichter den Énnergang vun den europäesche Götter beschriwwen hunn; en Énnergang deen eis Zivilisatioun an eng bis haut nach net erhellen Däischtert gehäit huet. Ech denken u Franz Kafka, Thomas Mann oder Marcel Proust a mam Bléck op d'Géigewaart, den John Maxwell Coetzee.

Si verbënnt d'Gefill vun engem Enn vun eiser Welt, deem mir net entkomme kënnen, net vun eisem Planéit, mee d'Opléise vun engem Modell vun téschemenschleche Bezéihungen, hirer sozialer Uerdnung an hir Wäerter, d'Affrostellen vun de bestanene Revolten. E Gefill wat eis haut och ëmmer méi bedrängt, och wa mir d'Enn vun der Welt schonn hannert eis hunn. Mir, déi all Dag mat Verbriechen a Konflikter konfrontéiert sinn, op ëmmer méi Plazen a mat enger Vitesse bei där souguer déi omnipräsent Medien an hirer deeglecher Informatioun net méi nokommen - déi, kaum genannt, schon nees langweilig ginn, fir ouni Spueren an den Dagesnorichten ze verschwannen an eis emzingelt, entsat a machtlos zeréckloossen.

Fir Tierm ze bauen ass et ze spéit, an déi Maueren déi mer an engem Stéck opriichten, bidde kee Schutz. Am Géigendeel. Mir selwer müssen eis Maueren beschützen, intakt an dicht halen, woufir de Groussdeel vun eiser Energie dropgeet. Et feelt dann d'Kraaft fir d'Welt hannert der Mauer, hannert den Dieren nach matzékriegen. A genee dat ass et jo wat den Theater ausmécht, grad hei läit seng Kraaft. Dohinn ze kucken, wou kucke verbueden ass.

"D'Legend versicht dat Onerklärlecht z'erklären. Well se aus engem Fong vu Wourecht kënnt, muss se nees am Onerklärlechen ophalen." - sou schreiw de Kafka iwwert de Mythos vum Prometheus. Ech gleewen drunn, datt dës Wieder och den Theater beschreibe sollten. An et ass genee deen Theater, deen an der Déift vun der Wourecht säin Ufank an am Onerklärlechen säin Enn huet, deen ech all sengen Acteuren vu ganzem Häerz wënschen; denen op der Bühn an dene virun der Bühn.

Krzysztof Warlikowski

Iwwersetzung: Serge Tonnar